

بِسْمِ اللَّهِ الرَّحْمَنِ الرَّحِيمِ

Khutba Jummah

HADHRAT KHALIFATULLAH

Munir Ahmad Azim

23 Janvier 2015 ~

(01 Rabi'ul Aakhir 1436 Hijri)

(Résumé Khutba)

Après ki li fine saluer tous so bane disciples (et tous bane musulmans) entier le monde par la salutation de paix en Islam, Hazrat Khalifatullah (atba) fine commence so Khutba Jummah comme d'habitude avec Tashahhud, Ta'uz, Surah Al Fatiha, et avant li vine lors sujet de so Khutba li fine lire sa verset Quran là :

الرِّجَالُ قَوَّامُونَ عَلَى النِّسَاءِ بِمَا فَضَّلَ اللَّهُ بَعْضَهُمْ عَلَى بَعْضٍ وَبِمَا أَنْفَقُوا مِنْ أَمْوَالِهِمْ فَأَلْصَقَ اللَّهُ قُلُوبَهُمْ قَلْبَهُمْ لَئِيْلٌ غَائِبٌ بِمَا حَفِظَ اللَّهُ وَاللَّيْلِ نَخَافُونَ نُشُوزَهُمْ فَعِظُوهُمْ وَأَهْجُرُوهُمْ فِي الْمَضَاجِعِ وَأَضْرِبُوهُنَّ فَإِنْ أَطَعْنَكُمْ فَلَا تَبْغُوا عَلَيْهِنَّ سَبِيلًا إِنَّ اللَّهَ كَانَ عَلِيمًا كَبِيرًا

Ar-rijaalu qawwaamuuna 'alan-nisaaa-'i-bimaa fazzalal-laahu ba'-zuhum 'alaa ba-ziww wa bimaaa 'anfaquu min 'amwalihim.

Bane z'hommes ena l'autorité lors bane femmes, parce qui Allah fine donne bane hommes ene supériorité lors bane femmes ; et z'hommes dépense zot di bien avec sa bane là. (An-Nisa 4: 35)

Dans même verset Allah (swt) continuer dire ki bane bons femmes bizin être dévoué, bizin surveille céki Allah dire zot surveiller, même quand personne pas pé guette zot.

Alors par sa verset du Quran Shareef là, ene mari so responsabilité pou accomplir devoir envers so bane madames li aussi important ki pou bane madames (si ena plisse ki ene mo pé dire, si non si li ena ene seul) pou zot accomplir zot devoir envers zot mari couma Quran fine faire nous comprend ki ene mari ena ene ti peu pli supériorité lors so madame (ou so bane madames).

Par sa verset Quran là, Allah (swt) fine montré nous ki l'homme et la femme sakaine ena zot droit (ki Allah fine donne sakaine d'entre zot) à réclamer et Allah (swt) fine montré aussi relation et responsabilité ki bizin ena entre mari et femme kot sakaine pou reconnaitre zot droit.

Par sa verset ki trouve dans Quran, kot Allah (swt) dire : « La femme li vêtement so mari et ene mari li ene vêtement pou so madame ». (Al-Baqara 2 : 188)

Par sa verset là, Allah (swt) fine oulé faire nous comprend ki droit mari et femme li égale. Tout le monde conné ki bane vêtement c'est couverture pou cassiette défauts de nous le corps. En plisse de sa, bane vêtements c'est ene moyen pou embellir nous et faire nous paraître joli, beau ou belle, et aussi ene protection contre la chaleur et fraîcheur.

En disant mari et femme comme le vêtement de sakaine, Islam oulé montré ki ene bon madame pou so mari, garde l'honneur et dignité so mari, ni li bizin alle confesser devant créature, et raconte devant li tous défaut de so mari et aussi ene bon mari pou so madame, li pas humilier et blâme so madame ou tire défaut so madame avec les autres créatures. C'est sa la beauté de l'Islam kot sa vêtement là signifier '*Pardah*', couverture ; la beauté kot madame là pas expose so beauté ni so l'habillement divant les zot créatures z'hommes, seulement à so mari et ni mari là so la vie pas bon. L'heure là pou ena la paix, tranquillité, bénédiction dans ene ménage.

Pareil couma bane vêtements cassiette bane défauts lé corps et li faire paraître élégance, comme sa même mari et femme zot vine vêtement pou zot partenaire en cachant défauts et faire paraître seulement bane bons côtés. Si mari et femme, au lieu ki zot disputer et réclame sakaine zot droit et aussi apporte malheur et la guerre dans ene ménage, li ti pou bon sakaine lire Quran Shariff et guetter couma Allah (swt) fine mette sa claire dans Quran lors droit ki ene mari ena, le droit ki ene madame ena et lère là ti pou vine facile pou sakaine d'entre zot comprend ki zot responsabilité dans ene la vie conjugale, lère là pas ti pou ena la guerre, dispute. Sakaine bizin comprend droit de zot partenaire ki Allah fine enseigne bane musulmans dans Quran.

Ene mari bizin vivre bien avec so madame et si arriver madame faire bane kitchose ki pas plaire ou sois li faire foutan avec li, Allah dire dans Quran à sa mari là, faire *Sabr* (prend patience) vivre avec li (ou zot) dans ene façon raisonnable, même si zot pas faire ou tout à fait plaisir.

Hazrat Muhammad (saw) fine dire ki aukène mari pas bizin garde rancune envers so madame si madame là ena certain défaut, ou li dire bane kitchose ki offense so mari. Alors pas garde rancune envers li, et madame là bizin ena certain bon qualités aussi.

Dans ene l'autre Hadith, Hazrat Muhammad (saw) pé dire : « *Parmi zot, bane dimounes ki nous capave appelle bon, c'est bane ki comporte zot bien avec zot madame* » et à l'occasion *Hajatul Wida* (le dernier pèlerinage), Hazrat Muhammad (saw) dire: « *O bane z'hommes... mo conseille zot agir bien et entretenir zot madame convenablement* ».

Sa bane commandement d'Allah et de So Rassool (saw) là démontré clairement ki devoir ene mari envers so bane madames. Tous mari péna même moyen pareil couma les autres mari ena moyen pou donne zot madames zot nécessité. Alors ene mari dépende de so moyen nécessité de la vie pou faire madame là plaisir, dans limite de so capacité. Allah en vérité pas content bane ki faire extravagance.

Madame so droit c'est aussi pou réclame so droit pou gagne relation sexuel avec so mari. *Shariat* pas fine mettre aukène limite pou gagne relation sexuel. Si ene mari pas pé satisfaire so femme, li fine faillir dans « *Haquq-ul-Ibaad* », c'est-à-dire, échouer dans so droit envers so madame et

maintenant mari bizin bien fortifier li et si arriver li ena plisse ki ene madame, li bizin équitable. Astère faudé pas madame là abuser lors sa droit là kot li fatigue so mari. Pensé bien ki li aussi li ene humain, bizin comprend mari là aussi ki parfois fatigué avec problème travail, stresse, ou problème santé. Faudé pas ki li vine ene sujet de grand discussion et ene madame bizin comprend aussi ki si mari là ena plisse ki ene, alors sakaine son tour. Alors li très important ki ene mari bizin satisfaire so madame, si madame pé envie gagne relation sexuel, c'est so droit.

Parski parfois arriver kot ene mari pas pé satisfaire so femme, ou trouve femme là quitte li, ou sois alle commette l'adultère. Alors li bien important ki mo mentionne sa droit fondamentale de la femme, li important pou mo raconte sa anecdote de Hazrat Oumar (ra). Ene fois pendant so tourné d'inspection la nuit de Madina Shariff, Hazrat Oumar (ra) fine passe par ene la case kot li fine tende la voix ene madame ki ti pé lire ene poème ki ti pé clairement décrire so l'état d'esprit, « *Si mo pas ti pou peur pou désobéir ene l'ordre Allah mo ti faire ene mauvais action (adultère)* ».

Le lendemain matin Hazrat Oumar (ra) fine enquérir lors sa madame là so situation et li fine apprane ki madame là so mari fine faire « *Jihad* » depuis bien longtemps et madame là népli capave résiste reste loin avec so mari. Alors Hazrat Oumar (ra) fine gagne bien chagrin et li fine alle demande so tiffille, Hazrat Hafsa (ra), c'est-à-dire, Hazrat Muhammad (saw) so madame, combien le temps ene madame capave reste sans so mari. Hazrat Hafsa (ra) réponde : « *Quatre mois* ».

Conséquemment Hazrat Oumar (ra) envoie ene lettre dans tous bane camp militaire pou annonce ki tout soldat marié péna droit reste en dehors so la case plisse ki 4 mois.

Mo réfléchi lors sa décision sage ki Hazrat Amir'ul Momeneen Oumar (ra) fine prend. Pareil couma mo ti déjà cause lors le sujet dans mo bane Khutba et discours d'avant, mo pose mo-même la question, est-ce-ki Jamaat Ahmadiyya pas au courant de sa ? Kan ene missionnaire fine vine *Waqfé-Zindagi*; alors zot éloigne missionnaire là avec so madame pendant 3 ans ou même plisse ki sa. Missionnaire pé travail dans pays étranger, li pé bizin occupe tous li même et so madame pas à côté de li, et zot bane patrons là ki ena l'autorité, quand zot déplacer pou quelques jours ou semaines, zot madames et zenfants ou famille bizin accompagne zot. Missionnaire li pas humain li ?!!! So madame bizin faire sacrifice so mari plisse ki 3 ans, même missionnaire là bizin faire sacrifice so madame plusieurs années. Eski li péna di sang ene z'homme ki circuler dans so lé corps ? Ki qualité l'injustice zot faire envers tous sa bane missionnaire ki quitte zot madames, zenfants alle travail plusieurs l'années dans pays étrangers?

Pourtant Allah (swt) fine béni sa Jamaat là, l'argent pas manquer, pou envoie zot famille avec zot, c'est purement ene *zouloum 'dominaire'* ki zot faire avec bane *Waqfé Zindagi* dans Jamaat Ahmadiyya. *Insha-Allah* dans Jamaat Ul Sahih Al Islam sa qualité '*Zouloum'* dominaire, l'injustice là pas pou ena pou nous bane *Waqfé Zindagi* ki pou alle travail pou la cause d'Allah. *Insha-Allah*. Même après mo la mort et bane ki pou prend la relève (mo place), mo pas oulé ki zot fer sa kalité dominaire là.

Donc, mo révine lors mo sujet (*sa pas mo sujet azordi, mais Insha-Allah, Allah (swt) donne Tawfiq pou cause lors sa qualité injustice là ene lotte fois*).

Quand ene madame faire faute, mari là bizin corrige sa faute là parfois avec gentillesse ou la colère ou soit li conseille li avec amour.

Bane mari aussi bizin faire sa ene devoir quand zot sorti pou alle travail, li bizin sorti avec ene sourire et faire *Salaam*. Si so madame tombe malade, c'est le devoir ene mari pou occupe so madame, prend soin de so malade et bizin traite li avec boucou de tendresse et sa moment là ki so madame malade là, mari là même bizin occupe zot zenfant, faire travail la case et la cuisine pou pas trop fatiguer so madame. C'est dans bane situation pareil ki vrai l'amour faire ressenti et aussi, si madame là envie alle guette so famille, mari faire so devoir amène li guette so famille. Ene mari jamais bizin raconte les autres, so la vie confidentiel matrimonial et comportement privé lors lili conjugale avec so madame. Li bizin garde tous so bane moments intime strictement secret pou li.

Dans ene Hadith, Hazrat Muhammad (saw) fine dire: Dimounes ki Allah (swt) pli détester, c'est celui ki faire action avec so madame en privé et li raconte en public ou sois avec les autres céki ti passé. Penser si madame conne sa, li pou manque confiance avec sa mari là.

Si fine arrive quelque mézente entre mari et femme, mari là pas bizin donne '*Talaaq*', ni madame là rode so *Talaaq* trop vite et montré so grand colère. Sakaine bizin garde zot calme et kan zot colère fine passer, sakaine bizin réfléchi avec l'esprit posé. Mariage, pas ene badinage et brite, brite pas donne *Talaaq*, ni rode *Talaaq* avec mari là. Pense bien, de nos jours bane jeunes ki pé marier, surtout bane filles et ki appartenir à bane grand famille, ou sois li ena ene poste travail, li gagne l'argent plisse ki so mari, alors li (madame là) vine mari dans la case et mari vine ene dimoune ki fine perdi so l'autorité.

Parfois ou trouve sa dans ene ménage; si ene mari trop douce et montré boucou l'amour pou madame là et li tolère li lors tous z'affaires, donne li tous so liberté ki bizin, même si li bizin sorti tousél, rentre l'heure li content et madame là senti li libre et li abuse lors faiblesse so mari et là ou trouve madame la pé dépasse tous limite ki bizin et li commence faire dominère avec mari là et si mari causer, li lève so la voix plisse et li prend so paqué linge li alle kot so famille et li commence dire tous sorte qualité causer pou faire croire ki mari là extra mauvais même, voilà kot ene mari donne so femme trop liberté, guette so résulta kot la vie conjugale pas marche bien et surtout si madame là travail, li ena contacte avec plusieurs personne, li envie amène so la vie comme les autres amener, li pas oulé personne commande li, voilà kot li même li rode so '*Talaaq*', kot li et so famille pas comprend narien de l'enseignement de l'Islam, pistonne mari là pou donne '*Talaaq*'. Kan mari là pas rode donne '*Talaaq*', li envie arrange so ménage et so madame retourner pou continuer zot la vie conjugale et voilà maintenant madame prend li comme ene belle femme, pé bien bizin li même, alors li faire plisse l'autorité, alors Allah même détester sa.

Dans ene Hadith Hazrat Muhammad (saw) fine dire ki parmi tous bane chose permissible (*Halal*) le plus détestable c'est '*Talaaq*'. (Abu Dawood, pg.303).

Sans réfléchi, ena donne *Talaaq* ou sois l'autre là dimande so *Talaaq* et si li pas gagne *Talaaq* li envoie ene '*Khula*' quand li pas conné même ki été ene '*Khula*', dans ki situation bizin envoie ene *Khula* et couma ene *Khula* préparé et signification ene *Khula* même zot pas conné. Et sa bane soi-disant savants là même pas conne vrai signification *Khula* et comment prépare ene *Khula* et dans ki situation bizin envoie sa.

Faire bien attention avant ki ou donne *Talaaq* ou sois ou dimane *Talaaq*, après sa ou pou alle regrette toute longue ou la vie. Et ene madame bizin réfléchi beaucoup avant li demande so *Khula*, parce ki ene *Khula* li pas couma ene *Talaaq*, et aucaine solution pas exister pou ki demain madame là retourne avec sa missié ki li fine divorcé (prend *Khula*) là, parski ene *Khula* li finale, et sans aucaine retour. Alors faire bien attention; astère là ou pas pou trouve sa, à la longue ou pou trouve so conséquence.

Alors mo termine le sujet de mo Khutba Jummah là même. Ki sakaine parmi nous réfléchi avant faire bane kitchoses ki so conséquence pou bien grave. *Insha-Allah. Ameen.*

ANNONCE :

1. Couma zot conné, ene cyclone tropicale bien violent « Chedza » fine abatte lors Madagascar, et d'après dernier bilan finale de bane l'autorité là-bas, en tout 46 dimounes fine mort, et plisse ki 120,000 dimounes fine perdi zot la caze. La pluie fine fer ravage pendant des jours et dans sa bilan là, 1000 l'école fine détruire. – Et ici à Maurice, ena bane forte pluie ki pé abatte lors Maurice. Météo Maurice fine lance ene bulletin spéciale de fortes averses et pé prévenir dimounes pou prend zot précaution.

2. *Alhamdulillah, Summa Alhamdulillah*, le Amir de nous Jamaat dans Kerala (Branche Sud) Jamaluddin Sahib fine raconte moi couma li fine inspiré de mo bane Mission Dawa dans bane pays du monde, et li fine décidé dès mo retour de Londres pour alle dans ene Voyage aussi, toujours lors Dawa/tabligh pour passe le message de l'Islam, du Jamaat Ul Sahih Al Islam, et de la venue d'ene Khalifatullah à tous bane dimounes ki li pou rencontrer. Li fine choisir bane places spécifiques de Tamil Nadu, surtout bane places kot l'Islam fine introduire pour la première fois dans sa partie du pays là. Malheureusement, li raconte moi, maintenant sa bane places là fine vine bane places bien malpropre (ki physiquement et aussi spirituellement), et le plus grand péché c'est ki zot fine construire bane Darga et prier bane Saints (*Pirs*), et bane les autres dimounes ki bane dimounes prend zot comme bane saints. Alors, ensam avec ene so cousin ki ene membre du Sunnat-e-Jamaat, zot fine alle dans sa bane places là. Le Amir Sahib fine aller pour so Dawa, pou ré-amène bane dimounes vers le Tawheed tandis ki so cousin, li ti ena le but pour alle lors sa bane Darga là, parski li ena croyance là-dans.

Alhamdulillah, de 10-15 Janvier 2015 li fine alle dans plusieurs l'endroit de Tamil Nadu, et li fine distribuer nous bane pamphlets et li fine passe le message ; et surtout li fine fer bane dimounes comprend : Kifer zot pé bizin prier bane saints et mujaddid ki fine mort et ki pas capave fer nannié pou zot, tandis ki de nos jours Allah fine fini élève ene So mujaddid ki li, li bien vivant et ki fine vini pou amène zot vers ene sel Allah ? Li fine raconter aussi ki dans so Dawa, li fine alle conné couma bane musulmans zot pas satisfaits ki fer nous bizin diviser en plusieurs sectes. Et alors, le Amir Sahib

fine donne zot la bonne nouvelle d'ene Mujaddid parmi zot dans sa siècle là. Et dans bane places kot l'islam ti établir en premier, là-bas li fine fer bane dimounes comprend ki pareil couma l'âge d'or de l'islam, maintenant pour maintenir sa la lumière et pureté de l'islam là, alors Allah fine envoie ene Muhyi-ud-Din et li fine invite zot pou contacter moi et prend connaissance de bane messages d'Allah. Li fine fer duah pou ki bane là accueillir sa humble serviteur là dans zot la vie comme le Muhyi-ud-Din de sa l'époque là.

Alhamdulillah, Summa Alhamdulillah, dans plusieurs de bane l'endroits pendant sa 6 jours là, li fine maximize so létemps dans le Dawa avec ene ferveur extraordinaire, et en vérité Allah fine béni li extraordinairement kot dans so chemin de retour, kan li et so cousin fine prend train pour rétourne à Kerala, alors Allah fine manifester ene signe extraordinaire de la Manifestation Divine et la véracité de sa humble serviteur là et aussi de mo disciple très cher à moi, et Allah fine manifester sa signe là afin ki sa vine ene témoignage de la vérité pour la vérité.

Le Amir Sahib raconté :

« Ene mo cousin, Ismail ki ene Maulvi Sunni ti accompagne moi tout au long de sa voyage là. Li fine visite tout bane Maqbara (cimetière), et li fine fer bane duahs spéciale et fine lire Surah Yasin, et ensam avec bane missiés et madames, li fine offert bane la lampes, fleurs et linges couleurs là-bas. Kan à moi, mo pé sans cesse dire li ki tout sa c'est contre bane l'enseignements de nous bien-aimé Saint Prophète (saw). Et mo fine répète li sa dans sak place ki li ti pé aller pou alle fer sa (bane systèmes là). Dans nous chemin retour, nous ti ena 20Km à parcourir pou arrive dans nous la ville. A sa moment là train là ti pé roule extra vite. Alors li fine fixé ene l'heure et dire moi ki façon ki train là pé roulé, nous pou arrive la caze à 2.15pm ou plus tôt.

*Alors sa humble serviteur là (le Amir Sahib) fine dire li ki nous bien-aimé Khalifatullah fine dire nous (ene Révélation d'Allah) « **Si zot vine pou Allah, alors l'Univers pou vine pou zot.** »* Alors to conné, sa derniers 6 jours là mo ti avec toi (en comptant aujourd'hui aussi). Mo seul but c'était pou passe le message d'Allah à propos de la venue d'ene Muhyi-ud-Din ki Allah fine choisir pour sa siècle présent là. Et mo fine répète toi souvent ki mo le premier disciple du Muhyi-ud-Din dans l'Inde. Alors moi mo dire toi, malgré ki mo rempli de faiblesses, **ki sa train là pou arrive dans station entre 2.30pm et 2.35pm Insha-Allah, et si sa arriver, alors témoigner ki Allah avec moi.**

*To fine fer ene tas Bidat (innovations) et to croire ki to pé fer bien. Alors prier saki to ti pé prier dans Qabr et moi mo pou prier Allah ki fine envoie So Muhyi-ud-Din pour sa siècle présent là. Anou guetter ki sanlà sorti victorieux ? Maulvi là ti bien content pou entendre tout sa et train là ti pé alle bien bien vite même, et alors li fine convaincu ki li pou arrive avant 2.15pm. Nek ene coup train là fine bizin arrête pour 12 minutes (ene contre-temps ki pas ti attane parski pareil couma mo disciple Hazrat Mukarram Fazil Jamal raconte moi, ni le Amir Sahib ni sa Maulvi là pas ti ena aucaine pouvoir lors sa train là et lors vitesse ki li ti pé aller et zot pas ti ena contrôle aussi lors sa obstacle ki zot fine bizin fer face après ki le Amir Sahib fine dire sa parole là pour ki la vérité sorti vainqueur kot Allah montré So pouvoir suprême et avec ki sanlà Li été vraiment), et ensuite train là fine ré-prend en marche et fine arrive station kan pendule pé sonne 2.30pm. Alors (le Amir Sahib raconter) avec larmes aux yeux mo fine crier : **Allahu Akbar, Allahu Akbar, Allahu Akbar !** »*

Quand fine arrive sa, Maulvi là fine reste *Quoike*, péna aucaine parole, et pour le Amir Sahib, sa voyage là fine du début à la fin ene expérience enrichissant ki fer so *Imaan* (la foi) augmenter encore plisse. *Alhamdulillah*.

Kan li fine arrive la maison, li fine fer 2-Rakaat *Tahiyyath* et *Shukr*. *Alhamdulillah, Summa Alhamdulillah*. Péna d'autres explications à donner. Sa signe divine là-même causer par li-même pou montrer la véracité de sa humble serviteur là, le Muhyi-ud-Din Khalifatullah et de mo bane disciples sincères.

Et tout dernièrement (*le 19 Janvier 2015*), après so retour de Tamil Nadu, le Amir Jamaluddin Sahib fine fer ene rêve extraordinaire. Li rêver ki li ti pé deboute dans la cour kot li dans Mathra dans so bane linges ki li habituer metté ordinairement. Mais, li ti surpris pou trouver ki sa place là fine transformer dans ene étendu bien vaste, hors de l'ordinaire. Alors, ene l'auto blanc et imposant avec ene bannière rouge couma bane haute personnalité ena fine vini. Ene dimoune haut et imposant fine sorti de sa l'auto là et fine souriyé avec li, et fine dire li :

« Tout zaffaire pé paraite couma Maya, n'est-ce-pas ? » ('Maya' en langue Malayalam : magique, mystique, mystérieux etc.).

Et ensuite sa haute personnalité là fine donne li en cadeau ene gros parcel (et le Amir Sahib dans rêve là fine penser ki sa c'est bane livres ki zot fine passe commande). Alors le Amir Sahib réponde sa missié là : **« Oui, nous envie établir ene très grand librairie spirituelle comme ene dépôt de tout bane Sagesse (connaissance) Divine. »** Et ensuite li fine réveillé et léver pour Tahajjud.

3. *Alhamdulillah, Summa Alhamdulillah*, le Amir Sahib Dr. Thahir Sahib, toujours de nous Jamaat Ul Sahih Al Islam de Kerala (Branche Nord) fine organise ene Séminaire dans Kozhikode, Kerala Samedi 17 Janvier 2015. *Alhamdulillah*, nous Amir Sahib fine inaugure le programme, et nous frère Hariz Sahib fine présider, et *Alhamdulillah*, nous fine gagne bane chercheurs de vérité aussi ki fine vine écoute le message ensemble avec nous bane membres du Jamaat.



4. *Alhamdulillah, Summa Alhamdulillah*, le Sadr Saheb de Sahib-al-Faraj Azim Ahmad Sahib avec so l'équipe dans Tamil Nadu pé fer bane grands travaux de côté Traduction de mo bane Khutba Jummah

et messages en langues Tamoule. *Insha-Allah*, maintenant, zot pé travaille lors ene livre lors la venue d'ene Muhyi-ud-Din, Mujaddid dans nous l'époque actuelle. Ki Allah fer zot réussi dans zot travail pour la cause et le plaisir d'Allah. *Insha-Allah, Ameen.*

5. *Alhamdulillah, Summa Alhamdulillah*, Hazrat Mukarram Fazil Jamal Sahib (de Delhi – *Originnaire de Kerala*) pé fer bane travaux excellents pour la cause d'Allah. Depuis ki li fine reconnaite le Khalifatullah de sa siècle là, Allah fine enrichi li avec beaucoup de connaissance spirituel et aussi séculaire. Quand mo guette sa dévotion, l'amour et respect ki li montrer envers moi et la cause d'Allah, sa fer moi pensé lors saki Nasir Ahmad Sultani ti publier lors so Facebook concernant Fazil Jamal kot li dire ki li ti gagne ene révélation (*Ilham*) – le 06 Décembre 2014 : « **Fazil Jamal Imam of the Era** » (*Fazil Jamal, Imam du Siècle*). Alors pou moi, quand mo fer duah et réfléchi lors sa révélation là, li pas étonnant ki ene l'époque pou vini, **si vraiment Nasir Ahmad Sultani croire dans so propre révélation** ki ene jour li pou bizin vini et prend *Bai'at* dans la main de Fazil Jamal. Fazil Jamal li le représentant du Khalifatullah de sa siècle là, et Allah conné ki bane faveurs spéciales Li fine réserver pour sa bien-aimé disciple du Khalifatullah, *Insha-Allah* de par so sincérité exceptionnelle ki li pou manifester *Insha-Allah*, ziska so dernier souffle lors sa la terre là. *Ameen. Summa Ameen.*